

«Clar – el video provochein nus empau culla homoerotica»

L'jamna vargada ha la band DUS cun David Friedli e Gino Carigiet ediu lur versiun romontscha dil hit mundial «Teenage Dirtbag» dalla band Wheatus. El video tier la canzun «Giuvn Grischuner» fan ei allusiun alla homoerotica. Buc il davos sco apper per dapli toleranza.

SUSI ROTHMUND/FMR

«Your new arrangement sounds fascinating (vies arranschament niev tuna fascinont)», ei la reacziun dalla band da rock Wheatus silla versiun romontscha da lur hit «Teenage Dirtbag». In bi compliment per la band DUS che ha titulau quella versiun «Giuvn Grischuner». Quella ei d'udir sin youtube ed auters canals.

Mo co ei il duo romontsch vegnius sin l'idea da realisar ina versiun romontscha d'in hit digl onn 2000? «En muments nostalgics tedlein nus magari musica da pli baul ed in da quels dis havein nus scuvretg quella biala canzun. Pil mument spitgein nus aunc silla lubientscha d'astgar schar emitter nossa versiun al radio e sperein ch'ei gartegi», di Gino Carigiet.

Il musicist oriunds da Siat e David Friedli fan da Goldiwil fan dapi 2016 communabla-mein musica. La primavera 2023 vul la band

DUS dar ora siu secund album. Sin quel vegn il «Giuvn Grischuner» denton buc ad esser d'anflar. «Per nies album niev vegnin nus a registrar tut mo atgnas canzuns. Enqualina ei semtgada, forsa publichein nus gia ordavon enqual schatg ellas medias socialas», declara Gino Carigiet che viva a Solothurn. Leu ha el saviu realisar siu siemi, ei musicist independent e dat era scola da musica e cant.

«Nus provochein empau»

Il video tier «Giuvn Grischuner» ha beinenqualin mess en connex cun homoerotica. Ei fuss per dir aschia igl emprem video musical homoerotica romontsch. Mo eis'ei propi aschia?

«David ed jeu fagein buc musica politica e tuttina havein nus pil solit in messadi cun nos tocs. Cul 'Giuvn Grischuner' s'engaschein nus per contonscher dapli toleranza. Clar, el video provochein nus empau culla homoerotica. L'emprema scena muossa nus en in letg. Il giuvn grischun Andri siemia da Noel. Noel sa denton esser in um ni ina dunna e quei laschein nus aviert», declara Gino Carigiet e sclarescha gest la damonda che fuss eventualmein vegnida sco proxima: «Na, David ed jeu essan buc in pèr homosexual. Nus essan denton gia daditg fetg buns amitgs. Sche nus essan sin tura sa ei era esser che nus durmin el medem letg – senza intenziuns sexualas. Persunas ch'enconuschan buca bein nus, fan lur patratgs ed aschia sedattan magari situaziuns detg legras», explica Gino Carigiet ed aschunta ch'el sez seigi homosexuals, David heterosexuals.



Ei lur video tier la canzun «Giuvn Grischuner» gl'emprem video homoerotica romontsch? Ina scena ord il niev video.

FOTO MAD



La band DUS cun David Friedli (sen.) e Gino Carigiet en ina localitad digl Hotel Bogn Tenigia en Val Sumvitg.

FOTO MAD

Denton propi Grischuner?

Il video ei dil reminent vegnius filmaus ella Val Sumvitg ell'ustria da Marc Cathomas e quel ha era fatg culs musicists ina guida tras ils baghetgs bandunai dil Bogn Tenigia. «Quei ei stau fetg interessant el bogn e ha dau bialas fotografias», di Carigiet. Tenor el ei igl ustier immediat staus prompts da metter a disposiziun las localitads da sia uustria: «Homoerotica ei stau negin tema per Marc, el ei immens to-

lerants ed aviarts.» A disturbar beinenqualin vegn perencunter forsa gia il tetel «Giuvn Grischuner». Correctamein fuss quei numnadamain in giuvn Grischun ni in giuvn dil Grischun. Vus canteis dil giuvn Grischuner, quei ei buca propi correct? – Gino Carigiet: «Uiii, buc? Ou, aha...aschia hai jeu empiru da dir quei! E suentier ina pausa manegia il musicist riend: «Quei ei forsa in tec penibel, in sbagl artistic.»